

– Իմանում եմ: Բայց ի՞նչ է անում հայրիկը, երբ Ծովիկը այդպիսի սուտեր է հնարում:

– Բարկանում է, պատոհիրում է, որ ինձ պարտեզը չթողնեն, որ միրգ ուտեմ:

– Հայրիկին կասեմ, որ չբարկանայ. դու խելացի տղայ ես, կասեմ, որ պարտեզի դուռը քո առջեւ չփակեն:

Նա իմ խոստմունքներից բաւական գոհ մնալուց յետոյ մի այլ խնդիրք եւս առաջարկեց:

– Ասա, որ մայրիկն էլ խելացի է, նրա առջեւ էլ դուռը չփակեն:

– Ո՞ր դուռը:

– Սենեակի դուռը: Հիմա այնտեղ է, դուռը փակած է: Ես այսօր ուզեցի, որ գնամ տեսնեմ, չկարողացա...

Վերջին խօսքերը այնպիսի զգացմունքով արտասանեց փոքրիկ երեխան, որ ինձ վրայ խիստ տխուր ազդեցութիւն գործեցին:

– Ինչո՞ւ ես կողպում մայրիկին սենեակի մէջ:

– Չեմ իմանում: Մայրիկը այնտեղ աղաղակում է, լաց է լինում... Ես էլ լաց եմ լինում, երբ մայրիկը լաց է լինում...

Երեխայի աչքերում արտասուք երեւաց:

– Հիմա այնտե՞ղ է մայրիկը:

– Այնտեղ է, ներսում, շատ ներսում... Հայրիկը չէ թողնում, որ դուրս գայ:

Այդ միջոցին երկու աղաւնիներ իջան, նստեցին սրահի վանդակապատի վրայ: Տեսնելով նրանց, փոքրիկը իսկոյն մոռացաւ այն ցաւը, որ զգում էր իր սիրելի մօր մասին: Նա խորամանկ կերպով նայեց իմ երեսին, աչքերը ծմմռեց եւ նշաններով հասկացրեց ինձ, որ սուս կենամ: Իսկ ինքը կուզէկուզ սկսեց մօտենալ թռչուններին: Նրանք անելի զգոյշ գտնուեցան եւ, նկատելով փոքրիկ դարանակային, թան, բայց շատ հեռու չգնացին, նստեցին բակի մէջ, մի կտրած ծառի բունի վրայ: Մանուկը շարունակեց հետամուտ լինել, եւ մի քանի րոպէից յետոյ թէ աղաւնիները եւ թէ նա այլեւս չերեւացին: Ես խիստ սակաւ անգամ տեսել էի մի այնպիսի աշխոյժ եւ կայտառ երեխայ:

«Տան գաղտնիքը երեխայից հարցրու», ասում է յայտնի առածը: Հիմա ես աղօտ կերպով հասկանում էի, թէ ինչու չէր երեւում մեր տանտիկինը: Անտարակոյս մի պատճառ պէտք է լիներ, որ նրան թաքստի մէջ էին պահում: